

Ahadi ya Mungu ya Milele

Analikumbuka agano lake milele, neno lile aliloviamuru vizazi elfu.

Zaburi 105:8.

Mungu anasimama nyuma ya kila ahadi aliyoitoa. Mkiwa na Biblia zenu mikononi, sema: "Nimefanya kama ulivyo sema. Ninawasilisha ahadi yako, 'Ombeni nanyi mtapewa; tafuteni nanyi mtaona; bisheni nanyi mtafunguliwa'" (Mathayo 7:7). ...

Upinde wa mvua unaokizunguka kiti cha enzi ni uhakikisho kwamba Mungu ni wa kweli; kwamba Kwake hakuna kubadilika badilika, wala kivuli cha kugeuka. Tumemtenda dhambi na hatustahili kibali Chake; lakini Yeye mwenyewe ametia midomoni mwetu ombi hilo la ajabu zaidi: "Usituchukie, kwa ajili ya jina lako, usikifedheheshe kiti cha enzi cha utukufu wako; kumbuka, usilivunje agano ulilofanya nasi" (Yeremia 14:21). Ameahidi Mwenyewe kusikiliza kilio chetu tunapokuja Kwake tukikiri dhambi na kutokustahili kwetu. Heshima ya kiti Chake cha enzi imesimikwa kwa ajili ya utimizaji wa neno Lake kwetu.

Kila mtu anayejitoe mwenyewe kwa Bwana kwa ajili ya utumishi, bila kuzuia chochote, hupewa nguvu kwa ajili ya kupata matokeo yasiyopimika. Bwana Mungu amefungwa kwa ahadi ya milele ya kutoa nguvu na neema kwa kila mtu ambaye ametakaswa kupitia utii kwa ukweli.

Nehemia akisukumwa kuingia katika uwepo wa Mfalme wa wafalme na alijipatia nguvu upande wake ambayo ingeweza kugeuza mioyo kama mito ya maji inavyogeuzwa. [Angalia Nehemia 1 na 2.]

Kuomba kama Nehemia alivyoomba katika saa yake ya uhitaji ni rasilimali ambayo Mkristo anayo katika hali ambazo aina zingine za sala zinaweza kuwa haziwezekani. Wafanyakazi katika maisha yenye shughuli nyingi, waliosongwa na karibu kuzidiwa na fadhaa, wanaweza kupeleka ombi kwa Mungu kwa ajili ya uongozi wa Mungu. ... Katika nyakati za shida au hatari za ghafla, moyo unaweza kutuma kilio chake cha kuomba msaada kwa Yule ambaye ameahidi Mwenyewe kuja kuwasaidia waaminifu Wake, wanaoamini kila wanapomwita. Katika kila hali, chini ya kila sharti nafsi iliyolemewa na huzuni na masumbufu au iliyoshambuliwa vikali na majaribu, inaweza kupata uhakika, msaada na shime kutoka katika upendo wa daima na uweza wa Mungu mwenye kutunza agano.